

III

(Gníomhartha ullmhúcháin)

AN CHÚIRT INIÚCHÓIRÍ

TUAIRIM Uimh. 1/2014

(de bhun Airteagal 325(4), CFAE)

ar an togra le haghaidh Rialacháin ó Pharlaimint na hEorpa agus ón gComhairle lena leasaítear Rialachán (CE) Uimh. 515/97 ón gComhairle maidir le cúnamh frithpháirteach idir údaráis riaracháin na mBallstát agus maidir le comhar idir údaráis riaracháin na mBallstát agus an Coimisiún chun a áirithiú go gcuirfean an dlí ar ábhair chustaim agus ar ábhair thalmhaíochta i bhfeidhm mar is ceart

(2014/C 94/01)

TÁ CÚIRT INIÚCHÓIRÍ AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 325(4) de,

Ag féachaint don togra le haghaidh Rialacháin ó Pharlaimint na hEorpa agus ón gComhairle lena leasaítear Rialachán (CE) Uimh. 515/97 ón gComhairle maidir le cúnamh frithpháirteach idir údaráis riaracháin na mBallstát agus maidir le comhar idir údaráis riaracháin na mBallstát agus an Coimisiún chun a áirithiú go gcuirfean an dlí ar ábhair chustaim agus ar ábhair thalmhaíochta i bhfeidhm mar is ceart ⁽¹⁾,

Ag féachaint don iarratas ar thuairim a dhírigh Parlaimint na hEorpa ar an gCúirt Iniúcháirí an 19 Nollaig 2013,

TAR ÉIS AN TUAIRIM SEO A GHLACADH:

RÉAMHRÁ

1. Is é is cuspóir don dréacht-Rialachán seo go gcuirfean i bhfeidhm reachtaíocht an Aontais go fónta i réimsí custaim agus na talmhaíochta, le go mbeadh sásraí níos éifeachtúla ag an gCoimisiún go háirithe, ach freisin ag údaráis chustaim agus údaráis eile na mBallstát, a chuideodh leis ó thaobh oibríochtaí lena sáraítear an reachtaíocht chustaim agus an reachtaíocht talmhaíochta a chosc, a imscrúdú agus a ionchúiseamh. Chuige sin, féachtar, leis an togra, leis an méid a leanas a dhéanamh:

(a) feabhas a chur ar an gcomhrac i gcoinne na calaíse i réimse na gcustam agus, go háirithe, sna cásanna sin ina mbíonn dearbhú míchruinn ar an ionad tionscnaimh, tuairisc mhíchruinn ar earraí agus mí-úsáid an chórais idirthurais ⁽²⁾, trí mheán an méid a leanas:

⁽¹⁾ COM(2013) 796 final an 25 Samhain 2013.

⁽²⁾ Féach mír 3.3.1 den mheasúnú tionchair atá ag gabháil le togra reachtach an Choimisiúin (Doiciméad Inmheánach Oibre de chuid an Choimisiúin SWD(2013) 483 final an 25 Samhain 2013).

- (i) bunachar sonraí lárnach a bhunú de ghluaiseachtaí coimeádán ⁽³⁾, de shonraí maidir le hallmhairí agus onnmhairí agus de shonraí maidir le hidirthuras;
- (ii) soiléiriú a dhéanamh ar an mbunús dlí chun sonraí custaim a roinnt idir an Coimisiún agus na Ballstáit;
- (b) cumhacht a thabhairt don Choimisiún doiciméid tacaíochta na ndearbhuithe a bhaineann le hallmhairí agus le honnmhairí a fháil go díreach ó chuideachtaí san earnáil phríobháideach, d'fhonn dlús a chur leis na nósanna imeachta imscrúduithe maidir le custaim, lena laghdófaí an líon díobh a chuirtear chosc ama orthu tar éis trí bliana ⁽⁴⁾;
- (c) trí phointe eile a shoiléiriú i ndáil leis an Rialachán atá ann cheana ⁽⁵⁾, sa mhéid go ndéantar an méid a leanas leis:
 - (i) tugtar an deis go bhféadfaí infheictheacht na sonraí sna bunachair a theorannú d'úsáideoirí ar leith;
 - (ii) cuíchóirítear maoirseacht ar chosaint sonraí;
 - (iii) faightear réidh leis an neamhchinnteacht dhlíthiúil maidir le hinghlacthacht faisnéise a fhaightear trí chúnamh frithpháirteach mar fhianaise in imeachtaí coiriúla náisiúnta.

2. Rinne an Chúirt imscrúdú ar an togra ón gCoimisiún i bhfianaise thorthaí a cuid oibre iniúcháireachta.

BARÚLACHA GINEARÁLTA

3. Measann an Chúirt go gcuideoidh an togra chun cuspóirí an Rialacháin a bhaint amach, faoi réir na mbarúlacha sonracha dá dtagraítear i mír 5 go mír 8. Thairis sin, ós rud é go bhfuiltear ag féachaint le hAirteagal 18b a leasú mar aon leis

⁽³⁾ Ar a dtugtar Teachtaireachtaí Stádais Coimeádán (CSMs) i dtionscal na loingseoireachta.

⁽⁴⁾ Féach mír 3.3.2.1 den mheasúnú tionchair atá ag gabháil le togra reachtach an Choimisiúin (Doiciméad Inmheánach Oibre de chuid an Choimisiúin SWD(2013) 483 final an 25 Samhain 2013).

⁽⁵⁾ Ibid, mír 3.3.2.2.

an eolaire dá bhforáiltear in Airteagal 18a agus Airteagal 18g den dréacht-Rialachán, táthar ag freagairt don ábhar buartha a cuireadh in iúl i mír 9 agus mír 10 de thuairim na Cúirte Uimh. 3/2007⁽⁶⁾, tuairim a eisíodh an tráth deireanach a leasaíodh an Rialachán seo. Measann an Chúirt freisin go bhfuil an soiléiriú in Airteagal 12 úsáideach, is é sin le rá gur féidir faisnéis a fhaightear trí chúnaimh frithpháirteach a úsáid mar fhianaise inghlactha in imeachtaí coiriúla sna Ballstáit. Ar na cúiseanna sin, is díol sásaimh don Chúirt é an togra ón gCoimisiún.

4. Ós rud é gurb é an Maoirseoir Eorpach ar Chosaint Sonraí an t-údarás inniúil do cheisteanna a bhaineann le maoirsiú ar chosaint sonraí agus gur gá don Choimisiún dul i gcomhairle leis dá réir sin, ní dhíríonn an Chúirt ar an ábhar sin sa tuairim seo.

BARÚLACHA SONRACHA

5. Le hAirteagal 18a agus Airteagal 18g den togra, leagtar amach na socruithe trína mbunóidh an Coimisiún eolaire de shonraí, agus trína ndéanfaidh sé anailís ar an eolaire sin, ar sonraí iad a fhaightear ó sholáthróirí seirbhísí, poiblí nó príobháideacha, atá gníomhach sa slabhra soláthair idirnáisiúnta, agus trína roinnfear na sonraí sin le húdarais na mBallstát. Le hAirteagal 18a(6) agus Airteagal 18g(3), teorannaítear an rochtain ar an eolaire sin do ranna ar leith den Choimisiún agus d'údarais náisiúnta agus leagtar amach gur faoi réir coinníollacha ar leith a bheidh aon aistriú sonraí a dhéanfar d'institiúidí eile. Mar sin féin, le forálacha seo an dlí thánaistigh ní féidir srian a chur ar chumhachtaí iniúchóireachta na Cúirte, cumhachtaí a bunaíodh leis an dlí príomha, eadhon Airteagal 287(3) CFAE. Cé nach bhfuil sé iomlán riachtanach tagairt a dhéanamh do chumhachtaí iniúchóireachta na Cúirte sa Rialachán leasaithe (CE) Uimh. 515/97, fós féin bheadh sé úsáideach dá léireofaí sna hAirteagail ábhartha go bhfuil na forálacha sin “gan dochar do cheart rochtana na Cúirte Iniúchóirí ar dhoiciméid agus ar eolas faoi Airteagal 287(3) CFAE”. Chinnteofaí, leis an méid sin, go mbeadh na páirtithe uile a bhfuil baint acu le cur chun feidhme an Rialacháin ar an eolas faoi chumhachtaí iniúchóireachta na Cúirte agus nach féidir na cumhachtaí sin a chur faoi réir coinníollacha sriantacha. Ar an gcúis chéanna, b'úsáideach é dá ndéanfaí tagairt don Chúirt Iniúchóirí in Airteagal 29, maidir le rochtain ar an gCóras um Fhaisnéis Custaim.

6. Le hAirteagal 18c go hAirteagal 18f, leagtar amach na socruithe lena bhfaighfidh agus lena bpróiseálfaidh an Coimisiún eolas maidir le gluaiseachtaí coimeádán isteach i gcríoch chustaim an Aontais, laistigh di agus amach aisti. Is iad na soláthróirí seirbhísí, idir sholáthróirí poiblí agus príobháideacha, a chuirfidh an t-eolas seo ar fáil, is é sin le rá, na cuideachtaí loingseoireachta. Mar chuid den ullmhúcháin den togra reachtach, chuathas i gcomhairle leis an gComhairle um Loingseoireacht Domhanda (CLD), ar ionadaí í thar cheann thart ar 90 % d'acmhainn dhomhanda na soithí línéir⁽⁷⁾. Leis an nós imeachta sin, áiríthítear, cuid mhaith, go bhfuil an togra inoibríthe agus nach gcuirfear costais mhíreasúnta ar na cuideachtaí loingseoireachta mar thoradh air⁽⁸⁾.

7. Tugann an Chúirt dá haire nach bhfuil aon fhoráil sa dréacht-reachtaíocht le haghaidh fíoraithe maidir le comhláine, iontaofacht agus tráthúlacht na sonraí a chuireann na cuideachtaí loingseoireachta ar fáil. Chomh maith leis sin, ní chuirtear aon acmhainní ar leataobh sa ráiteas airgeadais reachtach dá leithéid de nós imeachta ach an oiread. Is rioscaí iad comhláine, iontaofacht agus tráthúlacht na sonraí, rioscaí ar gá dul i ngleic leo, ag féachaint go cúf don chostas a bhainfeadh le haon rialuithe a gcuirfí i bhfeidhm.

8. Le hAirteagal 18h den togra, tugtar de chumhacht don Choimisiún (OLAF) doiciméid tacaíochta le haghaidh dearbhuithe i leith allmhairí agus onnmhairí a fháil go díreach ó oibreoirí eacnamaíocha, nuair atá gá leo sin d'imscrúduithe. Is í an aidhm go gcuirfí dlús le himscrúduithe OLAF, rud a laghdódh dá réir an riosca go mbeadh chosc ama ann. Measann an Chúirt gurb íomchuí an beart é an beart sin. Mar sin féin, ar mhaithe le comhar dílis, éifeachtach idir an Coimisiún agus na Ballstáit, b'iomchuí é dá bhforálfaí mar seo a leanas san Airteagal sin:

- (a) gur cheart go gcuirfeadh an Coimisiún údarais náisiúnta na mBallstát lena mbaineann ar an eolas faoi aon iarratais a dhéanfaí chuig oibreoirí eacnamaíocha; agus
- (b) go bhféadfaidh an Coimisiún cúnaimh a lorg ó na húdarais inniúla náisiúnta chun doiciméid a fháil, go háirithe i gcásanna nach gcomhlíonfadh na hoibreoirí eacnamaíocha an t-iarratas láithreach.

Ghlac Seomra CEAD an tuairim seo agus an tUas. Igars LUDBORŽS, Comhalta den Chúirt Iniúchóirí, mar cheannaire air i Lucsamburg ag a chruinniú an 25 Feabhra 2014.

Thar ceann na Cúirte Iniúchóirí

Vítor Manuel da SILVA CALDEIRA

Uachtarán

⁽⁶⁾ IO C 101, 4.5.2007, lch. 4.

⁽⁷⁾ Féach mír 2.4.2 den mheasúnú tionchair atá ag gabháil le togra reachtach an Choimisiúin (Doiciméad Inmheánach Oibre de chuid an Choimisiúin SWD(2013) 483 final an 25 Samhain 2013).

⁽⁸⁾ Ibid, leathanach 27. Tá an cur chuige seo bunaithe ar thaithí na Comhairle um Loingseoireacht Domhanda agus riachtanais chomhchosúla de chuid údarais Stáit Aontaithe Mheiriceá á gcur chun feidhme aici.